

DOMENIE XXX «VIE PAL AN»

Jutoris pe Liturgjie

Domenie, ai 28 di Otubar dal 2018

Gjesù, rivât a Gjeric, al è ormai a 27 kilometris di Gjerusalem: il pelegrinaç cu lis sôs vicendis bielîs e brutis si sta concludint e l'evangjelist al desiderê sierâ chest cjapitul de vite di Gjesù cun alc che nus fasi rifleti su ce che te realtât al è sucedût e nus prepari te fede a ce che a Gjerusalem al sucedarà.

E al sielç un vuarp che al jere sentât ad ôr de strade a cirî la caritàt.

Un fat, chest, fra il reâl e il simbolic: reâl parcè che sucedût, simbolic parcè che adatât a lis comunitâts di Marc li che il vanzeli al vignive predicjât. Il mes al è clâr: come pai apuestui e pai dissepui, come pes primis comunitâts cristianis, cussì ancje par noaltris, Bartimeo al è la nestre imagjine: o sin vurps tai misteris de vite e di Diu e o vin dibisugne di sintîsi dentri Bartimeo: che Gjesù i disè: «Ce vuelistu che ti fasi?» - «Signôr, ch'o puedi viodi!» - «Va, la tô fede ti à salvât». E a colp al viodè.

La domande e ven se par esperience personâl si cjatìn alc o dal dut vuarps in cheste nestre vite e tai moments problematicis e dificiis che i nestrîs paîs e comunitâts cristianis a stan passant; se o sintìn che la lûs, la liberazion, il disserniment, la sapience a puedin vignî dome cul cori - al saltà sù - li di Gjesù il Nazaren.

La antifone di jentrade e volarès metinus fra ducj chei ch'a van cirint il Signôr - e nus racomande: cirî il Signôr - cirî di un continui la sô muse.

Antifone di jentrade

Sal 104,3-4

Che il cûr si indalegri di ducj chei ch'a van cirint il Signôr.

Cirî il Signôr e la sô potence;

cirî di un continui la sô muse.

Colete

Diu onipotent e eterni,

fasinus cressi la fede, la sperance e la caritàt,

e, par podê vê ce che tu imprometis,

fasinus volê ben a ce che tu nus comandis.

Pal nestri Signôr Gjesù Crist to Fi, ch'al è Diu

e cun te al vîf e al regne dutune cul Spirtu Sant,

par ducj i secui dai secui.

PRIME LETURE

Gjer 31,7-9

O torni a menâ dongje consolâts il vuarp e il strupiât.

Cheste leture e aparten ai cjapitui de consolazion dal profete Gjeremie (cjap. 30-33) e e conte di cuant che i Israelits a tornaran de muart a la vite, de sclavitut a la libertât, di Babilonie a Gjerusalem (secul V p.d.C.).

In ché di ancje il vuarp e il strupiât, la femine ch'e spiete insieme cu la parturient a rivaran a cjaminâ tai savalons arsinîts dal desert. Compagn cuant che al rivarà Gjesù; di fat cun lui ancje il vuarp e il strupiât a podaran gjoldi de vite. E Gjesù al pues fâ miracui ancje sore lis nestrîs miserîis. Tu i dis Gjesù al sorestant de sinagoghe: no sta vê pôre, cîr dome di crodi, di vê fede (Lc 8, 4-56).

Dal libri dal profete Gjeremie

Il Signôr al dîs cussì:

«Dait sù cjantis di gjonde par Jacop

e scriulait pe prime des gjernaziis.

Fasêtlu sintî, scriulait e berlait:
Il Signôr al à salvât il so popul,
il rest di Israel».
Ve chi ch'ò soi: o tornarai a menâju dongje
de tiere de tramontane,
ju met adun dai ultins confins dal mont.
Framieç di lôr al è il vuarp e il strupiât,
la femine ch'e spiete insieme cu la parturient:
e je une fulugne di int ch'e torne chenti.
A son partîts vaint,
ju torni a menâ dongje consolâts:
ju torni a menâ ad ôr dai riui di aghe
par une strade plane, là che no si inçopedaran,
parcè che jo o soi un pari par Israel
e Efraim al è il gno primarûl.
Peraule di Diu.

SALM RESPONSORIÂL

dal Salm 125

Al è un salm di memoriis, di cuant che i esiliâts a Babilonie, tornant a Gjerusalem, ur pareve di insumiâsi; salm di ricognossince parcè che il Signôr al à fatis robononis.

Di chê grande esperience il salmist al trai une conclusion gjenerâl e sapienziâl che e vâl ancje par nô: chei che vaint a semenin, a seselaran plens di gjonde.

Par nô chest salm al à ancje une incorade invocazion: Torne a meti in sest il nestri distin, Signôr, come i riui che tal Negheb a scorin.

Come che une grande slavinade ur deve bondance di aghe ai riui suts dal Negheb, cussì il Signôr

al torni a dâ vite al nestri distin.

Il Signôr al à fat par nô grandis robis.

Se cjantât: Il cjant dai salms responsoriâi, p. 167.

Cuant che il Signôr al à tornât
a menâ dongje i presonîrs di Sion,
nus pareve di insumiâsi.
In chê volte o vevin ducj bocje di ridi,
e la nestre lenghe e cjantave di gjonde. **R.**

In chê volte fra i forescj a disevin:
«Il Signôr al à fatis par lôr robononis!».
Il Signôr al à fat par nô robononis:
cetant contents ch'ò jerin! **R.**

Torne a meti in sest il nestri distin, Signôr,
come i riui che tal Negheb a scorin.
Chei che vaint a semenin,
a seselaran plens di gjonde. **R.**

Chel ch'al puarte la semence di butâ
biel lant al vai;
invezit al torne indaûr dut legri
chel che i siei balçûi al puarte. **R.**

Tu tu sês predi par simpri, sul stamp di Melchisedek.

Crist al è in stât di vê dûl di chei ch'a son te ignorance e fûr di strade, parcè che al à vivut tal mieç di lôr, lui che al gustave insiemi cui pecjadôrs e cui publicans (cfr. Mc 2, 15-17).

Ma Gjesù al è ancje stât clamât di Diu che i à dit: Tu tu sês predi par simpri.

Lui al reste l'unic prin predi che o podìn cirî: al è Fi di Diu - Tu tu sês gno fi - ma insedât par simpri te nestre puare umanità.

De letare ai Ebreos

Ogni prin predi, cjapât sù tal mac dai oms, al è metût pal ben dai oms tes robis ch'a rivuardin Diu, par ufrîi regâi e sacrificis pai pecjâts. Cussi lui al è in stât di vê dûl di chei ch'a son te ignorance e fûr di strade, stant che ancje lui al è vuluçât di pecjis; e propit par chel al scuen ufrî ancje par so cont sacrificis pai pecjâts, come ch'al fâs pal popul.

Nissun nol pò cjapâsi chest onôr; dome chel ch'al è clamât di Diu, come Aron. Istessamentri Crist no si à cjapât l'onôr di prin predi, ma jal à dât chel che i à dit: "Tu tu sês gno fi; jo vuê ti ai fat nassi". Come ch'al dîs di un'altre bande: "Tu tu sês predi par simpri, sul stamp di Melchisedek".
Peraule di Diu.

AL VANZELI

Zn 8,12

R. Aleluia, aleluia.

Jo o soi la lûs dal mont, al dîs il Signôr,
chel ch'al ven daûr di me al varà la lûs de vite.

R. Aleluia.

VANZELI

Mc 10,46-52

Signôr, ch'o puedi viodi!

Signôr, ch'o puedi viodi! Che o puedi viodi alc dal misteri de mê vite, che o puedi scrutinâ la realtât dal gno popul, la muse di cheste glesie li che o vîf. Che o puedi viodi i fruts che a cressin, i zovins che si dan da fâ, lis fameis unidis, i tribulâts dongje di me, lis semencis di amôr dal ream di Diu che a florissin midiant di te.

Signôr, che o puedi cjalâ chest mont no cui miei vôi ma cui tiei, no cui miei resonaments ma cu la tô sapience, no cul gno cûr glaçât ma cul to afiet.

Magari dome come tun spieli fuscât, o tune fumate lizere, o tune albe che e sta nassint de gnot.

Che o puedi contemplâ alc dai misteris de solenità dai Sants e de zornade dai muarts che si svicinin.

Che o puedi come Bartimeo cori li di te par podê olmâ alc di me e di te. Amen.

Dal vanzeli seont Marc

In chê volte, biel che Gjesù cui siei disepui e une grande fole al stave saltant fûr di Gjeric, il fi di Timeo, Bartimeo, ch'al jere vuarp, al jere sentât ad ôr de strade a cirî la caritàt. Sintût ch'al jere Gjesù il Nazaren, al tacà a berlâ disint: «Gjesù, fi di David, ve dûl di me!». Alore une vore di lôr a scomençarin a cridâi ch'al stes cidin; ma lui al berlave inmò plui fuart: «Fi di David, ve dûl di me!». Alore Gjesù si fermà e al disè: «Clamaitlu chi!». A clamin il vuarp e i disin: «Dai, jeve sù che ti clame». Alore lui, butade vie la manteline, al saltà sù e al le denant di Gjesù. Gjesù i disè: «Ce vuelistu che ti fasi?». I rispuindè il vuarp: «Signôr, ch'o puedi viodi!». Alore Gjesù i disè: «Va, la tô fede ti à salvât». E a colp al viodè e si metè a lâi daûrji pe strade.

Peraule dal Signôr.

Su lis ufiertis

Cjale di bon voli, Signôr,
i regâi ch'o presentin a la tô maiestât,
par che l'ufierte dai tiei servidôrs
e ledi sù viers de tô glorie.

Par Crist nestri Signôr.

Antifone a la comunion

cf. Sal 19,6

Si indalegrarìn de tô vitorie
e o gjoldarìn tal non dal nestri Diu.

O ben:

cf. Ef 5,2

Crist nus à volût ben e si è ufiert par nô,
ufierte e sacrifici a Diu plen di bon odôr.

Daspò de comunion

I tiei sacraments, Signôr,
ch'a operin in nô ce ch'a significhin,
par ch'o podìn gjoldi te plenece de veretât
ce che cumò o fasin in maniere velade.
Par Crist nestri Signôr.

* * *

Riflession di pre Antoni Beline: Signôr, che o viodi!

Un dai plui bieci fats dal vanzeli pe grandissime umanità di Crist, pe fede fenomenâl di Timeo, chest biadaç che no i impuartavin ni creancis ni il convulç di chei che a stavin ben.

A lui i coventave la lûs, vivi come ducj i cristians. E il so berli, i siei berlis.....

Vanseli par un popul, an B, p. 174

* * *

Cjants

Libri Hosanna, sot dal titul Eucaristie: messe, benedizion eucaristiche, rîts e cjants; dal n.7 al n.62 comprendût.

* * *

Signôr, danus la lûs dai vôi e il lum dal Spirtu Sant.

Preiere populâr

* * *

Pe solenità di ducj i sants, pe memorie di ducj i defonts, zorndis serenis di ricuarts di famee.

Cjalìn in particolâr ai sants dai nestrîs paîs; lis personis che, tal scuindon e umiltât dai piçui di chest mont, nus àn nudrîts cui lôr esemplis di vite e di fede. Lôr a continuin ancje vuê, dongje dal Signôr, a stâ unîts a nô, a judânus e a volênus ben.

Recuie eterne, Signôr, pai nestrîs muarts; fâs che si impii par lôr il sflandôr de tô lûs pr in eterni.

Amen

* * *

La Bibie, midiant dal Istitût "Pio Paschini", e je tornade fra di nô te gnove edizion Setembar 2018, curade di un gnûf Comitât promotôr e te revision de grafie metude adun di pre Roman Michelotti.

Le ricevìn cul cûr content e i din la benvignude ricuardant e ringraciant ducj chei che, vîfs e muarts, ator di jê a àn fadiât. Le cjalìn ricuardant in particolâr pre Checo e pre Antoni; i fasin fieste cu lis peraulis de Cjante a la Peraule di pre Sef.

*O grande adorabil Peraule divine / tant cjare, tant buine /che simpri ti mediti, ti puarti cun me.
Ducj cuancj ti desiderin, tesaur di sapience,/nissun pò stâ cence,/e zovins e vecjos suspirin par te.
Peraule santissime, tu sês la mê stele / benefiche e biele: / ai pascui tu guidimi di vite e d'amôr.
Che al ridi pûr l'empio e perfit mi tenti: / beât jo mi senti / a l'ombre pacjifiche de leç dal Signôr.
Amen.*

A **La Bibie**, lungje vite. Cul avôt che e puedi nudrî come un bon pan e rinfrescjâ come aghe di mont il nestri popul, glesie, culture e storie.

O començarìn a segnâ lis citazions seont la gnove edizion de **La Bibie** cu la prossime domenie, 4 di Novembar, XXXI Vie pal an.

* * *

- * *I cjants, salms e cjantadis a vegnin ripuartâts cu la numerazion dal libri: Hosanna, Cjants e preieris dal popul furlan, Ed. Glesie Furlane, 2012.*
- * *Il cjant dai salms resposoriâi, Ed. Glesie Furlane, 2012.*
- * *50 corâi de cristianitât todescje voltâts par furlan, ed. Glesie Furlane, 2016.*
- * *Il libri des riflessions sul Vanzeli al è: pre Antoni Beline, Vanzeli par un popul, an B, Ed. La Nuova Base.*
- * *Par domandâ chescj libris scrivêt a info@glesiefurlane.org*